

## Tí xroon yóxin ikjin ch'ín Pablo chr'énhen ch'án tí ninko chjasin Corinto

<sup>1</sup> Janhan Pablo mé kjueyána Dios kixin sit'aha Ìnchéni Jesucristo xra, la ko kichó ni Timoteo ikjinni tí xroon i chr'ánhanráni tí jahará ninko Dios chjasin Corinto la ko kaín tí í so kichó ni tinkáchónki Ìnchéni tjejorá nkuíxín estado Acaya.

<sup>2</sup> Kjuasáyé It'éni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

### *Tí kjuasóte ch'ín Pablo*

<sup>3</sup> Tjancheheni kjuasáyé Dios It'é Ìnchéni Jesucristo. Jehe It'éni mé tikonóeheni ch'án la ko xráxín nchechéheni ch'án. <sup>4</sup> Jehe ch'án mé nchechéhe ch'án kaín tí jeheni tió tsi ijnko kjuaxróxinhya kixin ntá tsjachani sinchechéheni í so chojni kjuaxróxinhya ts'atsínka sín éxí yóhe jehe ch'án kjuínchechéhe ch'án tí jeheni. <sup>5</sup> Mé xikaha tjejótjasóteni éxí yóhe kjuasóte Cristo ntá kjaxin jehe ch'án imá sinchechéheni ch'án kixin tinkáchónkini ch'án. <sup>6</sup> Tjejótjasóteni kixin tí jahará chrókóchàxínrá la ko chrókuaáxinrá. A ntá Dios nchechéhe tí jeheni kixin kjaxin jahará chrókócháhará kixin ntá chrókjuachará kjónté chrókjuasóterá éxí tjasóteni jeheni. <sup>7</sup> Na mé ó noheni kixin chaxín ntoá tinkachónkirá Ìnchéni kixin ó noheni kixin jnkokón tjejótjasóteni kaín ni

ntá kjaxin jnkokón sinchechéhe Dios tí jeheni kaín ni.

<sup>8</sup> Kíchóni, tjinkaonni kixin chrókónohará kixin nkexrí imá kjuasóteni tí k'uéjóni tí estado Asia. Imá náxrjónhya kjuasóteni la chrókjuachahyani, la k'uitjáyhenni tí tjenkayáxinni kixin chrók'uaxrjexinni ntiha naxa chrók'uejóhónni. <sup>9</sup> Ó kónoheni kixin chrók'uenxínni ntiha. Mé xikaha kónhenni kixin chrókónoexínni kixin tí jehóni la chrókjuachahyani tíha. Náhi. Chrókuinkáchónkini Dios, mé tí nkexro nchexechón chojni tsík'en.

<sup>10</sup> Jehé Dios mé kjuínchekaáni ch'án la ko naxa sinchekaáni ch'án kixin tí nchónhya nkehe chrók'uenxínni. Méxra ó noheni kixin chaxín jehe ch'án sinchekaáni ch'án <sup>11</sup> tí tjínkĩtsaráni tjancheherá Dios kixin tsjinkĩtsani ch'án. A ntá tí tsjé chojni chrókjuanchehe Dios kixin tsjinkĩtsani ch'án ntá chr'éxin itsjé chojni tsjanchehe sín ch'án kjuasáyé kixin xikaha jehe ch'án kjuínkĩtsani ch'án.

### *Nkekuènte sákjuíhya ch'ín Pablo tí chjasin Corinto*

<sup>12</sup> Chéheni kixin noheni kixin ntoá k'uéjóni ntihi chjasintajni kjuích'iyehyani chojni, mé xikaha k'uéjókoaráni. Ntá jehya kjuachaxin kuènteni kjuachaxinni xikaha. Náhi. Kjuachaxin kuènte Dios mé kjuínkĩtsani kixin xikaha k'uéjóni. <sup>13</sup> Tió chr'ánhanráni xroon, kjinhyani nkehe chrókiénxinyará. Náhi. Jehó tí nkehe chrókjuínchekuáxinrá chrókiénxinrá. Tjéchonhan kixin chrókiénxinrá jína. <sup>14</sup> A ntá ó tinkakiénxinrá ntsí kixin tió tsokjan Ìnchéni Jesús tsöcháhará kixin xikaha kjuakoharáni jeheni la ko kjaxin tsöchéheni kixin jahará kuítekáonrá.

15 Mé xikaha kjuenkayáxian kixin saoxín chrókjuasántsjahará tí jahará kixin chrókócháhará kixin yáya chrókjuasántsjahará. 16 Kjuenkayáxian janhan chrókjuasántsjahará saoxín tió sáchrókjuia estado Macedonia la ko chrókjuasántsjahará ínaá tió chrókjanxian ntiha. Mé xikaha chrókjuínkítsarána tió sáchrókjuiyá janhan estado Judea. 17 ¿Á tjenkayáxinrá kixin ntoáhya kjuenkayáxian chrókjuasán ntiha ní? ¿Á tjenkayáxinrá kixin iyó nkehe kjuenkayáxian kixin jnkokoá chróntáxrjan kixin chrókjuasán la ko chrókjuasánhya? 18 Méxra tjetsjehe Dios kixin xikahya kjuátēheni tí jahará kixin chrókjuijini la ko chrókjuijihyani. 19 Kixin Cristo Jesús mé Xjeen Dios, na mé tí nkexro kjuakoxin ch'ín Silvano la ko ch'ín Timoteo la ko kjuákoxian janhan tí k'uéjóni ntiha, mé xikahya k'uéchronka ch'án, kjuích'iyahya ch'án ninkehó. Náhí. Kaín nkehe tjakoni kuènte Cristo la chaxín tíha. 20 Kixin kaín nkehe tsíchronka Dios la mé jehe Cristo kjuínchexiteyá ch'án. Mé xikaha tió tjancheheni Dios kjuasáya la mé ntáchroni “Amén, ó nchoxon” kixin tí kjuachaxin kuènte Cristo Jesús. 21 A ntá Dios mé kjuínkítsa ch'án tí jeheni la ko tí jahará kixin kaín ni ntoá chrókuinkáchónkini Cristo la ko jehe ch'án mé kjueyáni ch'án. 22 Kjaxin jehe ch'án tsíkjinchekani ch'án xroye, na mé kjuanjon ch'án Nchakuen ch'án tsochónta asénni senó kixin tsonoexínni kixin chaxín ts'áyēheni nkehe chr'éxin.

23 A ntá tí naxa kjuasánhya janhan chjasánrá Corinto éxí kjuenkayáxian la tjetsjehe Dios kixin tjínkakhonhya kixin chrókóxakonhanrá tí chrókjuéntuáhará tí jahará ínaá. 24 Jehya kixin

chrókuétuanhánrá kixin nkexrí chrókuinkachónkirá  
 Ìnchéni kixin ó nòna kixin ntoá tinkachónkirá ch'án.  
 Ó jehí tjinkaonni chrókjuinkitsaráni kixin antsí má  
 chrókócháhará.

## 2

<sup>1</sup> Mé xikaha kjuenkayáxian kixin chrókjuasánhya  
 janhan ntiha ínaá tí naxa xrásinrá kjuanínkaon.

<sup>2</sup> A ntá tí naxa chrókjuintak'ávára, çá  
 ntá nkexro chrókjuinchechàna ínaá tí  
 chrókjuinchechànahyará jahará kixin janhan  
 kjuintak'ávára? <sup>3</sup> Mé xikaha ikjian tí xroon  
 chr'anhánrá senó kixin tjínkakonhya chrókjuasán  
 chrókjuinchekóxakonnará ínaá. Náhi. Jahará  
 chrókjuinchechànará. Méxra ó nòna kixin tí  
 chrókóchàna janhan ntá chrókócháhará kaín  
 rá. <sup>4</sup> Kjánchó tió ikjian tí xroon a chr'anhánrá  
 senó la imá kóxakonhen asenná tsjanka kjaxin.  
 Kjánchó jehya kixin ikjian tí xroon a chr'anhánrá  
 kixin chrókjuintak'ávára. Náhi. Ikjian tí xroon  
 chr'anhánrá kixin chrókónoaxínrá kixin imá  
 tjuahará tí jahará.

*Ch'ín Pablo chrókjuinchek'itjáyenhen ch'án tí jie  
 kjuasin tí nkexro a*

<sup>5</sup> A ntá tí nkexro kjuínchexakonna la jehya  
 janhvàn kóxakonna. Náhi. Kaínrá kóxakonhanrá.  
 Kjánchó tjínkakonhya tjetóxin tsontáxrjan tíha.  
<sup>6</sup> Na mé itsjé tí jahará nixjehérá ch'án kóyakoterá  
 ch'án kixin chrókjuasinhya ch'án jie xikaha la  
 táhó la ó tjen. <sup>7</sup> Ntá jie chrók'uitjáyanhanrá tí  
 jie kjuasin ch'án, chrókjuínkitsará ch'án, kixin tí  
 náhi la ts'itjáyanxín ch'án tí kjuancheníhi. <sup>8</sup> Méxra  
 xrjanóahará kixin chrókjuákoxinrá ínaá kixin

chaxín tjuèhé<sup>rá</sup> ch'án. <sup>9</sup> Mé xikaha senó ikjian xroon chr'anhán<sup>rá</sup> kuènte tí kjuanínkaon chontará kixin tsononaxian á chrókjuin<sup>ch</sup>exiteyà<sup>na</sup>rá kaín nkehe chrókuétu<sup>an</sup>hán<sup>rá</sup>. <sup>10</sup> A ntá tí sin<sup>ch</sup>ek'itjáyenhen<sup>rá</sup> ijnko chojni ichrén jie kjuasin ch'án ntá janhan kja<sup>x</sup>ian sintak'itjáyan<sup>han</sup> ch'án tí jie kjuasin ch'án. Méx<sup>ra</sup> tí chaxín k'ue<sup>é</sup> ichrén jie chrókju<sup>in</sup>tak'itjáyan<sup>han</sup> ijnko chojni la ó kjuixin kju<sup>in</sup>tak'itjáyan<sup>han</sup> ch'án tí jie a kixin chrók'uejorá jnkojína. Kja<sup>x</sup>in xikaha tjetsjehe Cristo, <sup>11</sup> kixin ntá tí ch'ín Tsochren na tsjachahya ch'án tsjachroe ch'án tí jeheni, kixin ó noheni nkexrí ch'ia tí ch'ín Jínahya.

*Kóxakonhen ch'ín Pablo tí kjuák'e ch'án chjasin Troas*

<sup>12</sup> A ntá tió kjuasán tí chjasin Troas chrókjuà<sup>kua</sup> tí tan jína kuènte Cristo la a<sup>nt</sup>sí xránjon kjuachaxin kixin chrókón<sup>hen</sup> x<sup>ra</sup> kuènte Ìnchéni. <sup>13</sup> Kjánchó náxrjónhya tjen a<sup>se</sup>nná kixin k'uitjahya tí kichó ni Tito. Ntá tuénxín níxjaha tí jehe sín tjejó ntiha ntá sákjuia tí estado Macedonia.

*Ntá ó tsjacha sín tsochón<sup>ta</sup> sín kjuachaxin kuènte Cristo*

<sup>14</sup> Kjuasáyé Dios kixin xráxín jehe ch'án tjinkitsani ch'án ntá tjachani kixin chón<sup>tani</sup> tí kjuachaxin kuènte Cristo Jesús. Ntá kaín nketí sáchrókju<sup>ini</sup> mé tjako<sup>x</sup>inni tí tan kuènte ch'án éxí ijnko nkehe xraxé náxrjón chrókóxrjín<sup>hin</sup> kaín xín chojni. <sup>15</sup> Kaínni la éxí yó<sup>he</sup> tí xraxé náxrjón kuènte chjinc<sup>o</sup> chrókjuanjon Cristo chrók'uáyé<sup>he</sup> Dios kixin tíha mé chrókónoexín tí sín tsaá la ko kja<sup>x</sup>in chrókónoexín tí sín ts'itjáyan. <sup>16</sup> Tí sín ts'itjáyan mé

tókaxraxéhe sín éxí ts' enxín sín tí xraxé a. A ntá tí sín tsaá mé tóxrjínhín sín kixin ijnko nkehe tsjanjon kjuachón tíha. ¿Xá nkexro chrókjuacha chrókjuich'e tíha? <sup>17</sup> A ntá jeheni mé xrinchekjihyani nkexrí nixja itén Dios éxí ch'e nchónhya chojni chrókjuacha sín chichaon. Náhí. Kaín asénni tjakoni itén Dios kixin kjueyáni ch'án sich'eheeni Cristo xra, la ko tjetsjehe ch'án tí xra tjejóch'eni.

### 3

#### *Tí pacto nixin*

<sup>1</sup> A ntá xikaha ntáchroni, ¿á tjenkayáxinrá kixin kjuankíxinni tsochronkani inaá kixin jína tí jeheni, o á t'ichjánxín kixin chrókjuujikoni xroon kixin tsonoaxínrá kixin jína tjakoni? ¿Xá t'ichjánxín kixin chrókjuanchaharáni ijnko xroon tsochrónka kixin jína tjakoni? ¿Xá t'ichjánxín kixin chrókjuanchaharáni ijnko xroon tsochrónka kixin jína tí jeheni éxí ch'e í so sín? <sup>2</sup> Náhí. T'ichjánxienhyani nijnko xroon kixin jahará mé éxí yóhe ijnko xroon tsíkjinni xrikoni chróchóxin la ko chrókjuinchekuáxin kaín xín chojni tsonoexín sín kixin jeheni mé ch'eheeni Cristo xra. <sup>3</sup> T'ikon sín noxín kixin tí jahará mé éxí yóhe ijnko xroon tsíkjin Ìnchéni Cristo xrikoni nchekuáxin chojni. Kjánchó jehya ntahni tsíkjinxín ch'án. Náhí. Kjuanjon ch'án Nchakuen ch'án tjechón chontará la kjaxin jehya xrotabla tsíkjin ch'án. Náhí. Táha la asén chojni.

<sup>4</sup> Ntá ó noheni chaxín tíhi kixin tinkáchónkini Dios kixin tjinkitsani Cristo. <sup>5</sup> Jehya kixin ó jehí chróchóntani kjuachaxin kixin chrókjuich'eni

xra. Náhi. Kaín tí xra ch'eni na Dios tjetjanjon kjuachaxin. <sup>6</sup> Jehe ch'án mé kjuanjon ch'án kjuachaxin kixin chrókjuich'ehe ni ch'án xra tsochenkani chojni tí tan nixin kui. Tíha jehya ijnko nkehe tsíkin chojni chrókjuinchexiteyéhe ni. Náhi. Tíha mé kjuachaxin kjuanjon Nchakuen Dios kixin sinchexiteyéhe ni ch'án. Kixin tí ley ntáchro kixin its'en chojni. Kjánchó tí Nchakuen Dios la mé tjanjon kjuachón.

<sup>7</sup> Tí ley tsík'óna letra xrotabla mé imá kuikao t'inkaséyan la mé kjuachahya tí sín israelita chrókomá sín ikon ch'ín Moisés kixin imá tjákiní tsehe ikon ch'án.\* Kjánchó tí t'inkaséyan kjuankixin ó tinkák'anaka. Méxra tí xikaha tí ley tjanjon kjuach'én mé kuikao ijnko t'inkaséyan imá náxrjón. <sup>8</sup> ¿á chrókó jehya kixin antsí má t'inkaséyan kuikao tí tan nixin kuixin kjuachaxin Nchakuen Dios? <sup>9</sup> Méxra xikaha tí ley k'uéchóna kjuachaxin jié kjónté ntáchro kixin its'en chojni, a ntá antsí má jína tí tan chrónka Dios kixin tsotjuáxin tí jie chóntani. <sup>10</sup> Méxra tí kjuachaxin k'uéchóna tí ley k'uék'etoan ósé la ninkehó tóyóehya tí kjuachaxin jié tjen jie. <sup>11</sup> A ntá tí k'uéchóna kjuachaxin tí nkehe séhyó ntá tinkákjeje, a ntá antsí má chóna kjuachaxin tí nkehe tsjak'e jnkochrín.

<sup>12</sup> Mé xikaha tí nkehe tsejehya tjejóhónhenni ntá chrakonhyani chronkaxíni kaín tíha. <sup>13</sup> Ch'ehyani éxi kjuích'e ch'ín Moisés k'uikjèxin ch'án ka ikon ch'án kixin tsonoehya tí sín israelita kixin ó tinkákjeje tí t'inkaséyan chóna ch'án. <sup>14</sup> Kjánchó jehe sín naxa kienxínhya sín la ko naxa

\* 3:7 Éxodo 34.29-35

xikaha tjejó sín ijie tió nchekuáxin sín tí nkehe k'uítuenhen sín ósé kixin tí ka naxa t'inkákonhen tí chrókiénxín sín kixin naxa kjuínhya tí ka. A ntá tí chrókuinkáchónki sín Cristo la ntá jehe ch'án chrókjuatsen tí ka a. <sup>15</sup> A ntá kjónté jie tió nchekuáxin sín tí xroon tsíkjin ch'ín Moisés la tjejó sín éxí naxa t'inkákonhen tí ka a kixin tienxínhya sín. <sup>16</sup> A ntá tió ijnko chojni tsjankíxin tsinkáchónki Ìnchéni ntá tí ka t'inkákonhen la tsjin. <sup>17</sup> A ntá Ìnchéni mé Nchakuen Dios tíha. A ntá tí tjen Nchakuen kuènte Ìnchéni Dios la ntiha kohya nkehe ts'inkákonhen. <sup>18</sup> A ntá jeheni kaín ni kohya nkehe t'inkákonhen ikonni la mé tjejóni éxí xrosentá tjákiní tí kjuachaxin kuènte Ìnchéni, na mé tinkák'ixitóxin tí kjuaxrexinkaon kuènténi kixin antsí chrókóyóhēni éxí tí jehe ch'án kixin antsí tsochóntani tí kjuachaxin kuènte ch'án, kixin Ìnchéni, na tí Nchakuen a, mé xikaha ch'e xra.

## 4

<sup>1</sup> Méxra xikaha chrókóxrjéhyani chrókjuich'eni tí xra kjuanjon Dios kixin jehe ch'án kuikonóhēni ch'án. <sup>2</sup> Ó kuítóhēni kaín nkehe imó la ko kaín nkehe chrókósuèxinni, la ko ch'iyehyani kichó ni, la ko tjitoxienhyani itén Dios. Náhi. Jehí tí nkehe ntoá chrónkani. A ntá xikaha chrókónoexín kaín xín chojni kixin ntoá tjejóni éxí tjinkaon Dios. <sup>3</sup> A ntá jeheni mé tjakoni tí itan tsaáxinni, kjánchó iso sín kjónté xikaha tinhin sín mé tienxínhya sín kixin xráxín jehe sín la ts'itjáyan sín. <sup>4</sup> A ntá jehe sín kuítekakonyha sín, a ntá tí dios kuènte chjasintajni mé kjuínchek'ikonhya sín kixin chrókiénxínhya

sín, kixin ntá chrók'uikonhya sín tí t'inkaséyan kuènte tí tan kuènte Cristo, mé tí nkexro chóna kjuachaxin, a ntá jehe ch'án la mé yóhe éxi tsjehe Dios. <sup>5</sup> Tió tjakoni na mé jehya tjakoni kixin jeheni chrókuitekáonrá. Náhí. Chronkaxínni kixin chrókuitekáonrá Jesucristo mé Ìnchéni la ko chrónkani kixin jeheni mé t'aharáni xra tsjinkĩtsani tí jahará kixin tjuahará Jesús. <sup>6</sup> Na mé jehe Dios k'uetqan kixin tí xrohi ts'inkaséyanxín tí sítié a na mé kjaxin jehe ch'án kjuanjon ch'án xrohi ts'inkaséyanxín nkaya asénni kixin chrókjuachani chrókónoheni nkexrí tjen tí kjuachaxin jíé kuènte Dios t'inkaséyanxín Ìnchéni Jesucristo.

*Nkexrí chrók'uejóni kixin tinkáchónkini Ìnchéni*

<sup>7</sup> A ntá tí cuerpo kuènteni la yóhe ijnko chí tsík'óna nchetje tjinká nkehe tjete, mé xikaha ts'ikon sín kixin tí kjuachaxin jíé chónani la kuixin tí tjen Dios kixin jehya kuènteni tíha. <sup>8</sup> Chónani nchónhya kjuaxikaon la kjónté tsjachahya tí kjuaxikaon a. Imá tóxakonhenni la kjónté títoehyani tinkáchónkini ch'án. <sup>9</sup> Kjónté chónkíhi sín tí jeheni kjánchó Dios la kuítóehya ch'án tí jeheni. Kjónté k'uékoni kjuítsínkani kjánchó kjuínchek'itjányanhyani sín. <sup>10</sup> Kjónté nketí sájtini xráxín chrók'uenxínni éxi k'uenxin Ìnchéni Jesús, kixin xikaha tjakoxinni tí kjuachón chóna ch'án. <sup>11</sup> Méxra jeheni naxa tjejóhónni la xráxín síin kjuaxikaon kixin chrók'uenxínni kixin tinkáchónkini Jesús kixin kjaxin xikaha chrókjuakoxinni tí kjuachón chóna ch'án kjónté chrók'uen tí cuerpo chónani. <sup>12</sup> Kjónté

xikaha chrók'uenxínni, a ntá jahará tsochontará kjuachón.

<sup>13</sup> Éxí ntáchro tí xroon itén Dios tsíkjin sín ósé kixin: “Kuítেকavan ntá xikaha xrjanka.”\* A ntá kjaxin jeheni kuítেকaonni ntá xikaha chrónkani. <sup>14</sup> A ntá ó noheni kixin Dios mé tí nkexro kjuínchexechón tí Ìnchéni Jesús kjaxin sinchexechón ch'án tí jeheni koíni. A ntá jehe ch'án tsjiko ch'án tí jeheni la ko tí jahará kjaxinrá tí tjen Dios. <sup>15</sup> Kaín tíha kónhen kixin jahará jína chrók'uejoxinrá. La ko kjaxin xikaha nchónhyará chrók'uayéhérá tí kjuasáyé Dios, ntá antsí tsjé chojni ts'ejóni tsjancheheni Dios kjuasáyé kixin tí kjuachaxin jié chóna ch'án.

<sup>16</sup> Méxra chrókóxrjéhyani kjónté tinkákjeje tí cuerpo chóntani kixin ó noheni kixin jnkojnko yaon Ìnchéni mé tjenchek'ánkí ch'án tí kjuaxrexinkaon kuénténi. <sup>17</sup> A ntá tí nkehe tjasótexínni tí tjejóni ntihi jie mé tíha la tjoka ts'atsínka la ts'áyèxinni ijnko nkehe imá jié la ko í tsjejehya tíha. <sup>18</sup> Ntá chrókomáhyani tí nkehe siín chjasintajni ntihyó. Náhi. Chrókjueyáni tí nkehe naxa t'ikonhyéni kixin tí nkehe t'ikonxínni ikonni na mé nkehe chóxin tsjeje. A ntá tí nkehe t'ikonhyani mé nkehe tsjejehya.

## 5

<sup>1</sup> A ntá ó noheni kixin tió tsjeje tí cuerpo chóntani na mé yóhë éxí ijnko nchia tjoka tsjeje, a ntá Dios mé kjuích'éna jnkojnko nchia nixin ts'itjáyanhya jnkochríxín nkaya nkajní kixin jehya tja chojni

---

\* 4:13 Salmo 116.10

kjuích'énaxín tíha. <sup>2</sup> Tí naxa chóntani cuerpoéni ntihi la náxrjónhya tjejóni tjinkaonni tí ókjé cuerpo tsochóntani nkaya nkajní <sup>3</sup> kixin táha ts'inkáyani éxi ijnko ka, ntá xitjahya chrókótjóchínni. <sup>4</sup> Tí naxa tjejóchónxinni tí cuerpo chóntani jie la náxrjónhya tjejóni tjasóteni. Tjinkakonhyani xikahó chrókuítøkoni tí cuerpoéni ntaxin, na mé tjinkaonni kixin tí cuerpoéni ntaxin chrókónixin ó. Ntá chrók'uitjáyani tí chrók'uenxínni la ntá chrókuakjani tí kjuachón nixin. <sup>5</sup> Dios mé kjuenkayáxin ch'án kixin xikaha sinchekitonhenni ch'án ntá kjuínchekitonhenni ch'án tí Nchakuen ch'án kixin ntá chrókónoexínni kixin chaxín ts'áyéheni tí nkehe tsjanjon ch'án.

<sup>6</sup> Mé xikaha xráxin ó noheni kixin tí naxa tjejóni ntihi naxa chóntani cuerpoéni ntá naxa tjejókohyani Ìnchéni. <sup>7</sup> A ntá jeheni tjejóni tinkáchónkini ch'án kjónté t'ikonhyani ch'án. <sup>8</sup> Kjánchó jeheni na imá chéheni tjinkaonni chrókuítøheni tí cuerpoéni chóntani jie kixin sáchrókjuini tí tjen Ìnchéni, chrók'uejókoni ch'án ntiha. <sup>9</sup> Méxra xikaha tjinkaonni chrókjuinchechéheni Ìnchéni kjónté naxa chróchóntani cuerpoéni ntihi la o í chróchóntahyani, la naxa chrókuinkáchónkini ch'án. <sup>10</sup> Kixin kaín ni t'íchjánxin tsochjineheni Cristo tí tjen ch'án t'etøan ch'án kixin nkehe ts'áyéheni jnkojnkonni kixin nkerí xra kjuích'eni á jína o náhi tí naxa k'uéchóntani cuerpoéni ntihi chjasintajni.

*Tí tan tjanjon kjuaxróxin*

<sup>11</sup> Méxra xikaha noheni chróchrakonhenni tí kjuachaxin jié kuènte Ìnchéni ntá tóxakonhenni

tjako<sub>h</sub>eni chojni kixin chrókuinkáchónki sín ch'án. Ó nohe Dios kixin nkexrí tjejóni la ko tjinkaonni kixin kjaxinrá chrókónohará. <sup>12</sup> Jehya kixin chrótjonkará inaá kixin jina ch'eni xra. Náhi. Jehí ntáchroni kixin siín nkehe chrókóchàxinrá kixin tí jeheni ntoá chrónkani kixin chrókónohará nkexrí chrókjuáteherá tí sín imá nchehnke sín kixin imá náxrjón nixja sín a ntá xraxinkakonhya sín tí jie chóna asén sín. <sup>13</sup> A ntá tí lóconi na mé tíha kixin tjinkaonni chrókjuich'eheni Dios xra. A ntá tí jehya lóco tí jeheni la mé jehí tjinkaonni chrókjuinkitsani tí jahará. <sup>14</sup> Kixin Cristo la imá tjuèhe kaín xín chojni ntá t'etuehenni ch'án kixin ó noheni jina kixin jehó ch'án k'uenyákonhenni ch'án tí ijiéni kaín ni kixin éxi kjaxinni ik'uénni kaín ni kixin jehe ch'án k'uenyákonhenni ch'án. <sup>15</sup> Mé xikaha Cristo mé k'uenyákonhen ch'án kaín ni. Na ntá jeheni tjejóchónni mé tjejóchónxinni ch'án la jehya tí kjuaxrexinkaon kuènteni chrókjuinchexiteyéheni. Náhi. Chrókjuinchexiteyéheni ch'án kixin k'uenyákonhenni ch'án la ko xechón ch'án inaá kixin tsaáxinni ch'án. <sup>16</sup> A ntá jie jeheni tjenkayáxinhyani éxi tjenkayáxin chojni chjasintajni ó. Kjánchó senó k'uéchóxinni Cristo kixin nkexrí kjuák'e ch'án chjasintajni ó, a ntá jie la xikahya t'ikonni ch'án. <sup>17</sup> Méxra tí nkexro tinkáchónki Cristo mé k'óna ijnko chojni nixin. A ntá kaín nkehe ntaxin la ó kjuixin k'uátsínka la ntá jie la kaín nkehe ó k'óna nixin.

<sup>18</sup> Kaín tíha mé tí xra kjuích'e Dios. Jehe ch'án mé kjuanjon ch'án kjuaxróxin kixin jina chrók'uejókoni ch'án kixin k'uenyákonhenni Cristo. Ntá jie je-

heni k'uáyéheni tí xra tsochénkani í so chojni kixin kjuaxróxin chrók'uejóko sín ch'án. <sup>19</sup> A ntá ó noheni kixin Dios ichr'án Cristo k'uenyákonhenni ch'án, ntá xikaha Dios tjinkaon kixin kjuaxróxin chrók'uejóko ch'án tí sín chjasintajni, la ko jehe ch'án tahya ch'án kuentá kaín tí jie chóna chojni, a ntá jeheni k'uáyéheni tí xra tsjakoni itén ch'án. <sup>20</sup> Ntá jeheni kjuachaxin kuènte Cristo chronkaxinni kixin Dios chrónóaxinrá ch'án tí jeheni. Mé xikaha tí kjuachaxin kuènte Cristo chrónóaxinráni kixin kjuaxróxin chrók'uejokoará Dios. <sup>21</sup> A ntá Cristo la ninkehó jie kjuasinhya ch'án, ntá ijiéni k'uénxin ch'án. Kjánchó Dios k'uikon kixin éxí tí jehe Cristo chóna ch'án jie, kjuenkayákonhen ch'án kaín tí jie k'uéchóntani.

## 6

<sup>1</sup> Ntá kaín ni jnkokoá ch'eheheni Dios xra, ntá chrónóaharáni kixin chrókuitoéhyará tí kjuasáyé Dios kjuakuaxinrá ch'án. <sup>2</sup> Kixin ntáchro xroon itén Dios kixin:

A ntá tí yaon kóxrjínhin Dios kuínhin ch'án tí nkehe chronòa chojni;

Tí yaon tsaáxin chojni mé kjuínkítsa ch'án tí jehe sín.\*

A ntá jie ó kui tí yaon kjueyá Dios. A ntá jie ó kui tí yaon tsaáxin chojni.

<sup>3</sup> Ch'ehyani ninkehó nkehe jínahya kixin ntá chrók'uántaxínhin sín tí xra tjejóch'eni. <sup>4</sup> Náhí. Kaín nkehe ch'eni tjakoxinni kixin ch'eheheni Dios xra. Na mé tjachani tónínkakonhyani kjónté nchónhya nkehe tjasótéxinni, la kjónté ichrén nkehe

\* 6:2 Isaias 49.8

t'ichjánxinhinni, la kjónté ichrén kjuaxikaon síin.  
<sup>5</sup> Na mé k'uékonní, la k'uéjóchjinani, la nchónhya k'uíxite chojni kóninkakönhenni sín, la ko tí xra kjuích'eni la imá xra. Kjaxin k'uájuahyani la ko kjónehyani. <sup>6</sup> Tjakoqxinni kixin tjóá tjenkayáxinni, la ko tjakoqxinni kixin ó noheni tí nkehe chaxín, la ko tjakoqxinni kixin tónínkakonhyani, la ko tjakoqxinni kixin ch'eni tí jína. La ko chóntani Nchakuen Dios, la ko kaín asenni tjuèheni kichó ni, <sup>7</sup> la ko chrónkani tí tan ntoá kuènte Dios, la ko tjakoqxinni kixin chóntani tí kjuachaxin kuènte ch'án. Ntoá tjejóni ntá xikaha tsjachani ntá kohya nkehe tsonhenni. <sup>8</sup> Iso sín náxrjón nixjehé sín tí jeheni la ko iso sín náxrjónhya nixjeheni sín, la ko iso sín jína nixja sín nkexrí tjejóni la ko iso sín t'ántaxínhinni sín. Iso sín t'ikon sín tí jeheni éxí chojni ch'ia la ko iso sín ntáchro sín kixin jeheni chojni ntoá chrónka. <sup>9</sup> Iso sín ntáchro sín kixin chónhya sín tí jeheni kjónté chóxinni sín. Iso sín tjinkaon chrók'óyánni sín la kjónté naxa tjejóchónni. Kjuateni sín na kjónté k'óyanhyani sín. <sup>10</sup> T'aváni la kjónté xraxinkaonni kixin Inchéni t'ayakonhenni la chéheni. Éxí nòani jeheni na kjónté chénkani itsjé chojni tí itén Dios tsaáxin sín éxí chróchjéheni sín ijnko nkehe imá tjete xikaha. Éxí chóntahyani ninkehó nkehe la kjónté la kaín nkehe chóntani.

<sup>11</sup> Kíchóni tjejorá chjasin Corinto, ntoá chrónkani nixjahaaráni la ninkehó t'ayahyaaráni la mé kaín asenni tjuahará. <sup>12</sup> Jehya jeheni chrók'uitjáyan kixin chrótjuahará. Náhi. Jahórá t'itjáyan kixin chrótjuèhérá tí jeheni. <sup>13</sup> Janhan xrjanóahará éxí ijnko it'é xjan chrónóehé tí xjeen ch'án kixin

kjaxinrá kaín asánrá chrótjuèhérá tí jeheni éxí tjuèheni tí jahará.

*Jeheni mé éxí n̄inkoe Dios tjechón*

<sup>14</sup> Chrók'uitohyará tí sín tinkáchónkihya Ìnchéni kixin tíha mé éxí yóhe ijnko yunta, jnkokónhya koxinta. ¿La ko nkexrí chrókóyóhe ijnko chojni ó kótjóá la ko ijnko chojni naxa náhí? ¿La ko nkexrí chrókóyóhe tí t'inkáséyan la ko tí sítié?

<sup>15</sup> Xitjahya chrók'uixin kjuaxróxin tí tjen Cristo la ko tí Tsochren. Xitjahya ts'ejóko kíchó ijnko chojni tinkáchónki Cristo la ko ijnko chojni tinkáchónkihya. <sup>16</sup> Xitjahya chrók'uito tí n̄inkoe Dios la ko tí nkehe tsíkjanoya. Kixin jeheni mé tí n̄inkoe Dios tjechón, kixin jehe ch'án tsíntáchro ch'án kixin:

Ntaha tsjak'é la ko xritjak'é tí tjejó tí jehe sín,  
a ntá janhan mé ts'óna Dios kuènte sín  
la ko jehe sín mé ts'óna chjasin kuèntana.†

<sup>17</sup> Méxra xikaha kjaxin ntáchro Ìnchéni kixin:  
T'axrjekjanxínrá tí jehe sín na ókjé tjejorá;  
tsehyará tí nkehe tjuáhya.

A ntá janhan mé ts'ayáha tí jahará.‡

<sup>18</sup> Ntá janhan mé ts'óna It'ará,  
a ntá jahará ts'ónará xjanna ntoa la ko xjanna  
chjin,

ichro Ìnchéni Dios chóna kaín kjuachaxin.§

## 7

<sup>1</sup> Mé xixaha kíchó ni, tí nkehe i mé tsíntáchro Dios tsjanjon ch'án. Méxra t'ichjánxin kixin

† 6:16 Levítico 26.12, Ezequiel 37.27 ‡ 6:17 Isaías 52.11 § 6:18 Oseas 1.10

tjóá chrók'uejóni, chrókuítóhēni kaín nkehe chrókjuinčekjita tí cuérpoéni la ko tí asénni. Ntá chrókóxakonhēni chróchrakonhēni Dios la t'ichjánxin chrókjuanchehēni ch'án chrókjuinchetjóáni ch'án kixin jehó ch'án chrókuinkáchónkini.

*Tí sín Corinto kjuitoxinhin sín ntje sín*

<sup>2</sup> Chrókjuánjonrá kjuachaxin kaín asánrá chrókuinhínrá tí nkehe chróchronkani. Ninkehó jie chóntehyani ninkexró, la ko kjuích'iyehyani ninkexró. <sup>3</sup> Jehya ntáchroni tíhi kixin chrókuékará jie. Náhí. Ó nohará kixin ósé chrónkani kixin kaín asénni tjuèhēni tí jahará kixin jnkokoá chrók'uejóni la ko jnkokoá chrók'uēnni. <sup>4</sup> Janhan la imá tjíkosáyahará tí jahará la ko imá chàna kixin jína tjejorá. Kjónté kaín nkexrí tjejótjasóteni na imá chàna.

<sup>5</sup> A ntá tió kjuíjini estado Macedonia la xitjahya chrók'ok'éhēni kixin nkuíxín siín chojni nínkakonhēni la ko kóxakonhen asénni. <sup>6</sup> Kjánchó Dios na mé tí nkexro nchechéhe asén kaín tí sín tsíkóxrjé mé kjuínchechéhe ch'án asénni kixin ó kjuíji ch'ín Tito. <sup>7</sup> Ntá jehya kixin tí kjuíji ch'án ó chrókóchèxinni. Náhí. Chéhēni kixin jahará kjuinchechéhérá ch'án. Chrónka ch'án kixin imá tjínkáonrá chrók'uíkonrá tí janhan la ko chrónka ch'án kixin tóxakonhanrá kixin tí jie kjuásinrá la ko kjaxin tóxakonhanrá chrókjuich'erá tí nkehe kuétuānhanrá. Mé kuīnhan kaín tíha ntá antsí má kóchàna.

<sup>8</sup> Kjujintak'ávará kixin tí xroon kjian chr'anhánrá la kjónté la ntá jie í tóxakonnahya. Na mé senó kóxakonna ntá k'uíkuān kixin tí xroon

kjuíntaxakonhanrá kjánchó kánhyó isé tíha. <sup>9</sup> Ntá jie chàna, kjánchó jehya kixin tí nkehe kjuíntak'ávára. Náhí. Chàna kixin tí kjuat'áva a ntá ikjanrá kuinkachónkirá Dios. Kjuachará kjónté tí kjuat'áva ntá kjanrá kuinkachónkirá Dios la kóxrjínhin ch'án. Méxra xikaha jeheni la ninkehó nkehe jínahya kjuít'aharáni. <sup>10</sup> A ntá tí kjuat'áva kjuacha chojni ntá sinchechéhe sín Dios kixin kjuítóxinhin sín tí nkehe tjenkayáxin sín la ntá xikaha mé tsaáxin sín ntá í ts'áváhya sín chr'éxin. A ntá tí sín kuítóehya tí nkehe kuènte chjasintajni mé t'áva sín kixin táhó ts'enxín sín. <sup>11</sup> A ntá jahará kjuachará k'uátsínkará tí kjuat'áva éxí kóxrjínhin Dios, a ntá jie kónohará kixin jína tjejorá, la ó ntoá tjenkayáxinrá, ntá jie chronkaxínrá nkexrí k'uékjich'erá. Tí nkehe kuinhínrá ntá kjuinchekónínkaonrá la ko kjaxin kjuínchechrakonrá. Ntá chr'éxin ntá tjinkáonrá chrók'uikonrá tí janhan. Ntá kjuinchekjásóterá tí nkexro kjuasin jie. Kaín tíha kjuákoxinrá kixin chontahyará ninkehó jie tí nkehe tsíkónhen. <sup>12</sup> A ntá tí nkehe kjian la jehya kixin kjuenkayáxian janhan kuènte tí ch'ín kjuasin jie, la ko jehya kixin kjuenkayáxian janhan kuènte tí ch'ín k'uává ó. Náhí. Íchá jína kixin jahará chrókjuákoxinrá nkayakon Dios kixin imá tóxakonhanrá kixin jeheni xikaha k'uetoanni. <sup>13</sup> Mé xikaha kjuích'erá ntá kóchéheni.

Kjánchó antsí má kóchéheni kixin k'uíkonni kixin kóchéhe ch'ín Tito kixin jahará kaín rá kjuínkítsará kixin kjuaxróxin kjuák'e ch'án ntiha. <sup>14</sup> Janhan k'uétjanka tí ch'ín Tito kixin chàna kixin tí jahará

la jehya kjuach'ia tíha la kósuànahya. Náhí. Kaín nkehe k'uétjonkará la chaxín la ko kjaxin kaín nkehe k'uéntátjan ch'ín Tito la chaxín kixin chéheni kixin kuítekáonrá. <sup>15</sup> A ntá jie antsí tjuahará ch'án kixin xráxinkaon ch'án kixin nkexrí jína kuítekáonrá la ko nkexrí imá kjuíkosáyehérá ch'án kjuánjonrá kjuachaxin kuítóhe ch'án ntiha. <sup>16</sup> Ntá imá chàna kixin ó nòna kixin jahará sìnchexiteyànará.

## 8

### *Antsí má chrókjuínkítsa sín kíchó sín*

<sup>1</sup> Ntá jie kíchó ni, tjinkaonni chrókónohará kixin nkexrí tí sín tinkáchónki Ìnchéni tójnkotsé sín estado Macedonia kjuakoxin sín nkexrí tí kjuasáyé Dios. <sup>2</sup> Kjónté nchónhya nkehe tsíkónhen sín la kjónté la kóchéhe sín; la ko kjónté nòna sín la antsí má kjuínkítsa sín tí sín í so éxí chojni chóna itsjé chichaon xíkaha kjuích'e sín. <sup>3</sup> Chaxín k'uíquuan kixin kjuanjon sín éxí tí nkehe chóna sín la ko antsí má xíkjanjon sín inaá kixin xíkaha kjuenkayáxin sín. <sup>4</sup> Nchónhya chrónóehé sín tí jeheni kixin chrókjuanjonni kjuachaxin kixin chrókjuínkítsa sín tí sín kíchó ni tinkáchónki Dios. <sup>5</sup> Na mé antsí má kjuanjon sín la xíkahya kjuenkayáxinni kixin xíkaha chrókjuanjon sín, na mé senó kuínkáchónki sín Ìnchéni, ntá kjuixin ntá kjuínchexiteyéhe sín tí jeheni éxí tóxrjnhin Dios. <sup>6</sup> Méxra chrónóeheni tí ch'ín Tito kixin chrókjuenájín ch'án chichaon tí tójnkotsérá ntiha éxí kjuankixin ch'án senó. <sup>7</sup> A ntá jahará la tjákoxinrá jína kixin antsí tinkachónkirá Ìnchéni, la ko antsí k'uitjará chronkaxínrá itén Dios, la ko antsí k'uitjará nkehe kuènte Dios, la ko

antsí chontará kjuachéhe, la ko antsí tjuèhérá tí jeheni. Méxra xikaha antsí chrókjuákoxinrá tí xra jína chrókjuínkitsará tí sín kíchó ni.

<sup>8</sup> Jehya ntáxrjan tíhi kixin chrókuétuanhanrá xikaha. Náhi. Jehí tjínkavan chrókónohará nkexrí jína kjuích'e tí í so sín kixin kjaxinrá chrókjuákoxinrá kixin tjuèhérá kichuára. <sup>9</sup> Kixin ó nohará nkexrí tí kjuasáyé Ìnchéni Jesucristo kixin k'uéríko ch'án la ntá kónòa ch'án kixin imá tjuèhe ch'án tí jahará kixin tí kónóaxin ch'án mé jahará kórikóxinrá.

<sup>10</sup> Méxra tsotjonkará tí nkehe tjenkayáxian janhan kuènte tí xra i kixin jahará tí nánó k'uátsínka kjuankíxinrá kjuínkitsará kjuánjonrá nkehe, la mé jehya kixin ó jehí kjuínkitsará sín. Náhi. Kjaxin imá kócháhará kixin kjuínkitsará sín. <sup>11</sup> A ntá jie chrókjuintaxín chrókjuánjonrá éxí tí chrókjuachará chrókjuánjonrá éxí xrankíxixín tsíkjataherá tsjínkitsará tsjánjonrá nkehe. <sup>12</sup> Mé xikaha tí chaxín tjinkaon jnkojín chojni chrókjuanjon sín nkehe, ntá tsoxrjínhin Dios tí tjanjon sín tí nkehe chóna sín. Dios la tjanchahya ch'án tí nkehe chóntahya chojni.

<sup>13</sup> Jehya kixin xikaha tí í so sín chrók'uejó sín jína kixin tí nkehe kjuínkitsará sín la ntá jahará chrók'uitjayan nkehe t'ichjánxinhanrá. Náhi. <sup>14</sup> Chrókójina chrókóyóhe chróchontará nkehe jnkokón. A ntá jie jahará chontará tí nkehe chóntahya tí í so sín. A ntá í jnko yaon jehe sín tsochóna sín tí nkehe tsochontahyará. Chrókjuínkitsará tí sín chóntahya kixin chróchontará nkehe jnkokón. <sup>15</sup> Éxí ntáchro xroon itén Dios

kíxin: “Tí sín kjuenájín sín nchónhya la mé xèhya sín ninkehó, la ko tí sín kjuenájín sín tsjéhya na mé kjónté tsjéhya la kjuacha tí nkehe kuicháxinhin kjuenájín sín.”\*

*Ch'ín Tito la ko tí sín k'uájiko ch'án*

<sup>16</sup> A ntá kjuasáyé Dios kíxin kjuínchexraxinkaon ch'án tí ch'ín Tito ntá kóxakonhen ch'án éxí tóxakonna kíxin tí jahará. <sup>17</sup> Ntá kóxrjínhin ch'án tí nkehe k'uetuenhenni ch'án, la ntá kjaxin jehe ch'án kóxakonhen ch'án kíxin á jína tjejorá, ntá jehe ch'án tjinkaon ch'án chrókjuijitsjehe ch'án tí jahará.

<sup>18</sup> Kjaxin k'uetuanni sátsjikotoxin tí ch'ín Tito í jnko kichó ni, na mé kaín chjasin tí sín tinkáchónki Ìnchéni mé chóxin sín ch'án kíxin tí xrā jína tjech'e ch'án tjako ch'án tí tan tsaáxinni. <sup>19</sup> La ko kjaxin tí sín kaín tí nínko ntihi kjueyá sín tí nkexro kichó ni kíxin sátsjikotoxin ch'án tí jeheni tí xrā sátsjikoni tí chichaon tsjikénhenni tí sín nò. Na mé tí xrā ch'eni kíxin xikaha tsjikosáyeheni Ìnchéni la ko xikaha tjakoxinni kíxin tjinkaonni chrókjuinkitsani sín. <sup>20</sup> Tjinkaonni kíxin tsokohya nkexro chrók'uántaxínhinni kíxin tí chichaon xrenájín kjuíjjikoni. <sup>21</sup> Méxrā tjinkaonni chrókjuich'eni tí nkehe ntoá, jehya jehó tí nkehe chrókóxrjínhin Ìnchéni. Náhi. Kjaxin tjinkaonni kíxin chrók'uikon chojni kíxin jína tjejóch'eni.

<sup>22</sup> La ko kjaxin k'uetuenhenni sín sátsjikotoxin sín í jnko kichó ni, na mé ijnko nkexro nchónhya nkexrí kjuakoxin ch'án kíxin chéhe ch'án chrókjuínkítsa ch'án kíxin itsjé xrā kjuích'e ch'án. A

---

\* 8:15 Éxodo 16.18

ntá jie ąntsí má chrókjuich'e ch'án xrą kixin chóxin ch'án tí jahará. <sup>23</sup> A ntá jnkojín sín tsjanchankí sín kixin nkehe tí xrą ch'e ch'ín Tito la mé chenkará sín kixin jehe ch'án mé tjinkĩtsa ch'án tí janhan kixin xikaha tjinkĩtsa ch'án tí jahará. A ntá tí tsjanchankí sín kixin nkehe tí xrą ch'e tí í so kichó ni ntá chenkará sín kixin tí sín kaín ninko k'uetoan sín kixin sátsji sín ntiha kixin mé xikaha tsjikosáyehe sín Cristo. <sup>24</sup> Méxrą chrókjuákoxinrá kixin chaxín tjuèhérá kichuárá kixin tsonohe tí sín kichó ni í so ninko la ko kjaxin tsonohe sín kixin chaxín chéheni kixin tí jahará.

## 9

### *Tí chichaon xrenájín tsjinkĩtsa tí sín kichó ni*

<sup>1</sup> A ntá tí xrenájín chichaon kixin tsjínkĩtsará tí sín kichó ni tinkáchónki Ìnchéni, la t'ichjánxienhya tsokjian xroon tsochr'anhánrá <sup>2</sup> kixin xráxín kónòna kixin jahará tjinkáonrá chrókjuínkĩtsará, na mé xikaha chàna la tjanka tí sín tjejó estado Macedonia kixin jahará chojni estado Acaya desde tí nánó k'uátsínka xráxín tjejorá tjinkáonrá chrókjuínkĩtsará. A ntá ąntsí tsjé sín estado Macedonia tjinkaon sín chrókjuinkĩtsa sín kixin jahará xikaha kjuákoxinrá nkexrí tjinkáonrá chrókjuínkĩtsará. <sup>3</sup> A ntá ichr'an tí sín kichó ni kixin tjínkavan kixin tsonáchrohya sín kixin chaxínhya tí nkehe jína ntátjan sín senó. Mé xikaha jahará chrókóyaxínhanrá chrókjuínkĩtsará tí sín kichó ni éxí ntátjan sín senó. <sup>4</sup> Kixin tí chrókjuasánkian iso tí sín Macedonia ntá tí chrókónoxín kixin naxa kohya nkehe tsjánjonrá ntá chrókósuèheni tí jeheni kixin

imá chóxinni kichó ni la ko kjá chrókósuàhará kjaxinrá. <sup>5</sup> Méxra xikaha tóna kixin t'ichjánxin tsontátjan tí sín kichó ni kixin sátsji sín tsitónxin sín ntia tsijjitsjehe sín tí jahará senó tsjinkitsa sín kixin tsjenájínrá tí chichaon tsintáchrora senó kixin chrókjuánjonrá. A ntá chrókóyaxínhanrá kixin chrókjuánjonrá tí chichaon éxi ijnko nkehe chaxín tjinkáonrá chrókjuánjonrá la jehya éxi ijnko nkehe chrókjuanchaharáni afuerza.

<sup>6</sup> Xráxinkáonrá kixin tí nkexro k'uēnkā tsjéhya na mé tsjéhya tsotjá. A ntá tí nkexro k'uēnkā itsjé mé tsotjá itsjé. <sup>7</sup> Méxra jnkojnko chojni chrókjuanjon tí nkehe kjuenkayáxixín sín asén sín. Na mé tjinkakonhya Dios kixin kénhya asénni chróchjéheni ch'án nkehe, kixin Dios mé tjuèhe ch'án tí nkexro chéhe tjanjon nkehe. <sup>8</sup> A ntá Dios chónka kaín kjuachaxin jié ntá tsotjáhará ch'án kaín nkehe t'ichjánxinhanrá kixin tsochontará nkehe tsochjehérá í so chojni chóntahya kixin xikaha sich'erá kaín xra jína. <sup>9</sup> Éxi ntáchro tí xroon itén Dios kixin:

Tí nkexro t'óxikayēhe ch'án itsjé nkehe  
nchekitonhen ch'án tí sín nòa

na mé nunca tsjejehya tí xra jína ch'e ch'án.\*

<sup>10</sup> Dios mé tjanjon noatje kixin ts'inka la ko jehe ch'án mé tjanjon nkehe sineni, la ntá kjaxin tsotjáhará ch'án kaín nkehe t'ichjánxinhanrá la ko jehe ch'án sinchek'ánkí ch'án tí nkehe ts'ēnkará la ko jehe ch'án sinchek'ánkí ch'án tí xra jína tje-joch'erá. <sup>11</sup> A ntá tsochontará kaín nkehe tjete kixin ntá antsí tsjachará tsjínkitsará tí í so sín

\* 9:9 Salmo 112.9

kíchó ni. A ntá xíkaha tsjijikenhenni sín tí nkehe tsochjehérá tí sín kíchó ni ntá tsjanchehe sín Dios kjuasáya. <sup>12</sup> Kíxin xíkaha chrókjuínkĩtsará tí sín kíchó ni na jehya kíxin chrók'uáyéhe sín tí nkehe t'ichjánxinhin sín ó, la mé kjaxin chróchjéhe sín Dios kjuasáya. <sup>13</sup> Mé xíkaha tsjanchehe sín Dios kjuasáya kíxin tí nkehe kjuánjonrá kjuákoxinrá kíxin nchexiteyéhérá tí tan kuènte Cristo. Kjaxin tsjikosáyehe sín Dios kíxin tí í so nkehe kjuánjonrá k'uáyéhe sín la ko tí nkehe k'uáyéhe í so chojni. <sup>14</sup> La ko jehe sín tsjanchehe sín Dios kíxin tsjinkĩtsa ch'án tí jahará kíxin jehe sín tjuahará sín kíxin t'ikon sín kíxin tjákoxinrá kíxin tí kjuasáyé Dios chontará. <sup>15</sup> Tjancheheni Dios kjuasáya kíxin kjuínchekĩtonhenni ch'án ijnko nkehe imá jié tsaáxinni la tsjachahyani tsochronkaxínni kaín tíha.

## 10

*Kjuachaxin chóna ch'ín Pablo kíxin tsík'óna ch'án apóstol*

<sup>1</sup> Janhan Pablo tió xrjanóahará nkehe la jnkojína xrjanóahará la mé tjákoxian éxí toxrjínhin Cristo. Ntáchrórá kíxin tió tjèn tí tjejorá ntiha la tósuàna, a ntá tí kjín tjèn la imá jièna, ichrorá. <sup>2</sup> Méxra xrjanóahará kíxin tí tsjasántsjahará tjínkakonhya kíxin chrókjuínchekóninkáonráni kíxin ntá tsonínkakhonhánrá jnkojínrá kíxin tsékaráni jié kíxin ixria éxí chojni chjasintajni ó, tsixrorá. A ntá xra ó tsjasán tsjentuáha tí jehe sín. <sup>3</sup> Chaxín tjejóni éxí chojni ó, na kjánchó tió tjanjonni la tjanjonhyani éxí tjanjon chojni chjasintajni.

4 Kíxin tí nkehe xraáni tjanjonxinni jehya nkehe kuènte chjasintajni. Náhí. Táha la kjuachaxin kuènte Dios la tíha mé tsjacha sinchek'itjáyan kaín kjuachaxin kuènte tí Jínahya. 5 Na mé tsjachani sinchek'itjáyaní tí nkehe ntoáhya tjenkayáxin chojni la ko kaín nkehe nchehnkexín sín t'inkákonhen kíxin chrókóchóxin chojni Dios. A ntá kjuachaxin kuènte Cristo tjakoheni kaín chojni kíxin ntá tsítóhe sín kaín nkehe ntoáhya tjenkayáxin sín, a ntá chrókuitekakonhen sín tí jehe ch'án 6 la ko tjejóchónhenni sinchekjasóteni kaín tí sín ntiha naxa tjinkakonhya sín chrókjuinchexiteyá sín tí tsjixin tsonoheni kíxin á chaxín tsjachará sinchexiteyará jína.

7 A ntá jahará tékaráni jie kíxin tí nkehe t'ikonrá ó. A ntá tí nkexro tjenkayáxin kíxin chaxín ch'ehe Cristo xra la mé kjaxin chrókjuátsoan kíxin kjaxinni jeheni la ch'eheeni Cristo xra. 8 A ntá tí chrókjuintahnkena ntsí kíxin tí kjuachaxin chonta janhan ntá chrókósuànahya kíxin Ìnchéni kjuanjon tí kjuachaxin kíxin chrókjuínkítsa tí jahará kíxin antsí chrók'uitjará kuènte Dios, la mé jehya kíxin chrókjuintak'itjáyanrá. 9 Tjínkakonhya kíxin chrókjuintachrakonxínrá tí xroon chr'anhánrá. 10 Kíxin ntáchro sín kíxin ixra la ko jiehe tí nkehe ikjian janhan, a ntá tí chrókjuak'é ntiha la jienahya la ko kánhyó chonta janhan kjuachaxin tí nixja janhan. 11 Kjánchó tí nkexro xíkaha ntáchro chrókónohe ch'án kíxin jnkokón nixja janhan éxí nixja tí xroon tsíkjian kjónté ikjín tjèn la ko kjónté tí chrók'uejóni ntiha.

12 Tjinkakonhyani chrókjuenkayáxinni kíxin

chrókóyóhēni tí í so sín ntáchro sín ḱixin j́ina tí jehe sín. Jehe sín mé lont́i sín ḱixin ncheyóhē sín asén sín í so chojni. <sup>13</sup> A ntá jeheni la chrókjuinchehnkexínhyani ijnko xra jehya xra kuènteni. Dios mé kjuako nketí sich'eni xra la kjuanjon ch'án kjuachaxin ḱixin kjuíjini kjuích'eni xra tí tjejorá chjasin Corinto. <sup>14</sup> Jehya ḱixin chróchóntahyani kjuachaxin chrók'uetuanhanráni. Tí chaxín jehya jeheni saoxín kjuíjini tí tjejorá ntá xikaha chróchóntahyani kjuachaxin. Ntá náhí, ḱixin jeheni saoxín kjuíjini ntiha kjuakoharáni itan kuènte Cristo. <sup>15</sup> Chrókjuinchehnkexínhyani ijnko xra kjuích'e ókjé chojni éxí xra chrókjuich'eni jeheni. Náhí. Tjinkaonni ḱixin antsí chrók'uitjará tsinkachónkirá Ìnchéni ntá xikaha la antsí chrókjuinkitsani tí jahará ḱixin jehó tí xra k'uáyéhēni tjejóch'eni. <sup>16</sup> Kjaxin tjinkaonni chrókjuakoni tí itén Ìnchéni chrókuaáxin chojni í so chjasin sáchrókjuini la ko kjaxin chrókjuinchehnkexínhyani tí xra chrókjuich'e ókjé chojni.

<sup>17</sup> A ntá jnkójín sín tjinkaon sín chrókjuinchehnke sín ntá jehó chróntáchro sín ḱixin kjuachaxin Ìnchéni mé chóna sín.\* <sup>18</sup> Ḱixin tóxrjienhya Dios ijnko nkexro jehó chróntáchro ḱixin j́ina ch'án. Náhí. Ìnchéni mé tsontáchro ch'án nkexro chaxín j́ina.

## 11

*Ch'ín Pablo la ko tí sín chaxínhya apóstol*

---

\* 10:17 Jeremías 9.24

<sup>1</sup> Tjínkavan chrókuinhínrá ntsí tí lontina. ¿Á chrókjuachará chrókuinhínrá nkehe tsontáxrjan?  
<sup>2</sup> Janhan tjínkakhonhya kixin í jnko nkexro chrókuinkachónkirá. Kjaxin xikaha tjinkakonhya Dios. Ó ikjua Cristo kixin chrókuakja ch'án tí jahará. Tjínkavan chrókjuánjuan tí jahará chrókuakja tí jehe ch'án éxí yóhe ijnko tjan tjarisoá chrókótehe jnkokoá xii. <sup>3</sup> Tóxakonna kixin éxí tí konche tí kjuach'ia xriko ntá kjuích'iyehé tjan Eva, ntá xikaha kjaxinrá jahará tsitohérá sit'ayahará ókjé chojni ntá tsitohérá tí nkexrí kaín asánrá tinkachónkirá Cristo. <sup>4</sup> A ntá jahará cháhará tjanjonrá kjuachaxin tjiji ókjé chojni ntiha chronkaxín sín í jnko Jesús ókjé jehya éxí tí chronkaxínni jeheni, la ko kjaxin cháhará k'uayéhérá ókjé nchakuen jehya tí Nchakuen Dios k'uayéhérá saó, la ko cháhará chrókuitekáonrá ijnko nkehe ókjé chrókuaáxinrá jehya éxí tí nkehe kuitekáonrá senó. <sup>5</sup> Ó nòna kixin chaxínhya ninkehó sínkíhyana janhan, a ntá antsí sínkí tí sín chréhérá jahará, ichrorá. <sup>6</sup> Kjónté kánhyó náxrjón níxja janhan la jehya kixin kánhyó chrókónòna chrókjuàkua. A ntá tjákoáxinrá jahará tíhi kixin kaín nkehe t'a.

<sup>7</sup> ¿Á ntoáhya kjuít'a janhan xrjankaxián tí tan tsaáxinni kixin ninkehó kjuáncháhya chrókjuacha la ko éxí ijnko chojni nòé kjuak'é janhan kixin tjínkavan chrókjuínkìtsará chrók'uitjará? <sup>8</sup> Tí sín í so njnko kjuínkìtsana sín kjuanjon sín chichaon k'uayáha kixin tsjak'é tsjákohará jahará. <sup>9</sup> Tí kjuak'é tí tjejorá jahará la kjónté t'itjáyan nkehe la ninkexró kjuáncháhya nkehe. Jehó tí sín

kíchó ni kjuixín estado Macedonia kjuikao sín tí nkehe t'ichjánxinna. Méxra tjínkəkonhya kixin chrótjəhará xra tí jahará la ko xikaha naxə tjet'a jie. <sup>10</sup> Xikaha chaxín choxian tí tan chaxín ntoá kuènte Cristo, a ntá kohya ninkexró nkuixín estado Acaya tsjacha tsakitsjena tí kjuachéhe chonta. <sup>11</sup> ¿Nkekuènte xikaha ntáxrjan? ¿Á xikaha ntáxrjan kixin tjuəhyará tí jahará ní? Náhí. Dios la ó nohe kixin imá tjuəhará.

<sup>12</sup> Kjánchó ó jehí tsjintaxín xikaha sit'a kixin tjínkəkonhya tsjánjuan kjuachaxin kixin nchehnkexín tí sín ixri ntáchro kixin jnkokón kjuachaxin chóna tí nkehe tjəkua la ko tí nkehe tjako sín. <sup>13</sup> Kjánchó jehe sín ijnko apóstol chaxínhya mé ch'ia sín ncheyóhó sín éxí chojni kjueyá Cristo. <sup>14</sup> Jehya ijnko kjuachrakon tíha kixin kjaxin ch'ín Tsochren kjaxin xikaha ncheyóhe ch'án éxí ijnko ángel kuènte tí t'inkaséyan. <sup>15</sup> Méxra xikaha kjaxin kuènnen tí sín ch'ehe tí Jínahya xra mé ncheyóhe sín tí sín jína. Ntá tsjixixín mé tsjasótexín sín tí xra jínahya kjuích'e sín.

*Kjuasóte ch'ín Pablo kixin apóstol tí jehe ch'án*

<sup>16</sup> Ntáxrjan ínaá kixin nijnkorá chrókjuenkəyáxinrá kixin lócona. Kjánchó tí xikaha tjenkəyáxinrá la tjtóhərə tsonixja janhan éxí lócona kixin kjaxinna jína chrókjujntahnke ntsí. <sup>17</sup> Tí xikaha ntəhnkexián la jehya kjuachaxin kuènte Inchéni ntáxrjanxian tíha. Náhí. Jehí éxí ijnko chojni lóco nixja. <sup>18</sup> A ntá nchónhya chojni síin nchehnkexín sín tí nkehe nohe sín a ntá jie la kjaxin janhan sintahnke. <sup>19</sup> Kixin jahará ntáchrorá kixin imá nohará ntá cháhará tjejó tí sín lóco.

<sup>20</sup> Kíxin tjánjonrá kjuachaxin t'etuanhanrá sín la nchexiteyéhéra sín la ko takitsjahará sín tí nkehe chontará la ko ch'éna asén sín éxí ìnché sín tí jahará, la ntá kjoníehyará sín la ko tjate sín nkaya ikonrá.

<sup>21</sup> Kjónté chrókósuàna tsontáxrjan kixin jeheni la kánhyó jiehe k'uetuanhanráni.

Kjánchó tí nkehe nchehnkexín sín la janhan ntahnkexián kjaxinna, kjónté ntáxrjan tíhi éxí ijnko chojni lóco. <sup>22</sup> ¿Á chojni hebreo jehe sín? Kjaxin janhan. ¿Á chojni israelita jehe sín? Kjaxin janhan. ¿Á k'uaxrjeníxin sín ch'ín Abraham? Kjaxin janhan k'uaxrjeníxian ch'án. <sup>23</sup> Ch'ehe sín Cristo xra kjánchó janhan la antsí má la jehe sín la kénhyó, kjónté ntáxrjan tíhi éxí ijnko chojni lóco. Janhan la antsí má kjuít'a xra a ntá jehe sín la kénhyó, la ko antsí má kjuak'échjina ntoechiso a ntá jehe sín la kénhyó, la ko antsí má kjuatena chojni a ntá jehe sín la kénhyó, la ko nchónhya veces k'uíxin kjuaxikaon kixin chrók'uén. <sup>24</sup> In'ó veces tí sín judío kjuatena sín la ko treinta y nueve tí kjuatjoté. <sup>25</sup> Níya kjuatexínna sín inta la ko í jnko vez kjuak'e sín xro. Níya k'uániánkí ntabarco ntá ntá ijnko yaon la ko ijnko tie tjénkataván ntayaon. <sup>26</sup> K'uájia má, k'uíkuan kjuaxikaon chrók'uénxian tí ntarío la ko chrók'óyánna tí xichee la ko chrók'óyánna tí sín chjasenná la ko tí sín tsíkjin óké. K'uíkuan kjuaxikaon tí chjasin jie la ko tí nteje la ko tí ntayaon la ko chrók'óyánna tí sín chaxínhya tinkáchónki Ìnchéni. <sup>27</sup> Kóxrjéna kixin tí xra kjuít'a la ko itsjé nkehe náxrjónhya kónna. Itsjé tie kjuak'échrinhya jína la ko itsjé yaon ik'uén kjinta la ko ik'uén ntá la ko itsjé yaon kjónhuya ninkehó

la ko kókinna la ko chontahya kaná.

<sup>28</sup> Kjónté kaín tíha la ko í so nkehe kònna la mé jnkójnko yaon imá tóxakonna kixin kaín tí sín tójnkotsé sín kaín tí nínko. <sup>29</sup> ¿Á tjen jnkójínrá níhará? A ntá tí xíkaha la koína éxí nina. ¿Á tjen jnkójínrá kjuásinrá jie? A ntá tí xíkaha la kjaxin tóxakonna. <sup>30</sup> Tí chrókjuíntahnkexian nkehe la mé tjínkavan kixin jehó chrókjuákoxian kixin kánhyó jiena. <sup>31</sup> Dios, It'é Ìnchéni Jesucristo, na mé tí nkexro chrórxaxinkaonni jnkochrínín mé ó nohe ch'án kixin chaxín tí nkehe ntáxrjan. <sup>32</sup> Ntá tí kjuak'é chjasin Damasco la mé tí ch'ín gobernador kjuích'ehe ch'ín rey Aretas xra mé k'uetuēhen ch'án tí sín soldado kixin tsochónhen sín tí ntója tí chjasin kixin chrótséna sín chrókjuak'échjina. <sup>33</sup> Kjánchó siín nkexro k'uínkajinxinna ijnko ntaxra ijnko ventana tí tját'ò k'uantatjen chjasin la mé xíkaha kuaána, tséhyana sín.\*

## 12

### *Tí nkehe k'uíkon ch'ín Pablo*

<sup>1</sup> Ninkehó tsjachahya tí nkehe tsoxrjanka kuèntana ó. Íchá jína tsoxrjanka tí nkehe k'uíquān la ko tí nkehe kjuínchenòna Ìnchéni. <sup>2</sup> Choxian ijnko nkexro tinkáchónki Cristo. A ntá k'uátsínka catorce nánó sátsíkji ch'án tí nixin nkajní. Nonahya á sátsíkjiko ch'án cuerpo kuènte ch'án o asén ch'án ó. Jehó Dios mé nohe. <sup>3</sup> Méxra ó nòna kixin xíkaha sátsíkji ch'án la ntá nonahya á koí cuerpo kuènte ch'án o asén ch'án ó. Jehó Dios mé nohe. <sup>4</sup> A ntá

\* 11:33 Hechos 9.23-25

sátsíkji ch'án nkajní. La ntá tí palabra kuínhin ch'án la kohya kjuachaxin nijnko chojni tsochronka. <sup>5</sup> Jína chrókjuıntahnkexián kixin xikaha kónhen tí nkexro a. A ntá tí chrókjuıntahnkexián kixin kjuachaxin kuéntana la jehya jína tíha. Íchá jína chrókjuákoxiān kixin janhvàn la chontahya kjuachaxin. <sup>6</sup> Tí chrókjuıntahnkexián tí nkehe kònna la chrókólócohyana kixin chaxín tí nkehe chróxrjanka. Kjánchó xikahya t'a kixin tjínkakonhya kixin xikaha chrókjuenkayáxin chojni kixin antsí jína janhan. Náhí. Tjínkavan kixin tí xrā t'ikon sín la ko tí nkehe tinhin sín mé chrókjuenkayáxixín sín kixin á jína tí janhan, tsixro sín.

<sup>7</sup> Méxra chrókjuıntahnkexinhyana ntá xikaha xránjon kjuachaxin kixin chrók'uayáha ijnko kjuatjoté éxí ijnko ch'í kuikjiáte cuerpo kuéntana mé ijnko nkehe tsík'etuenhen ch'ín Tsochren ikui kjuínchekjoténa. <sup>8</sup> Iní veces xrjanóaha Ìnchéni kixin chrókjuatsen ch'án tí kjuatjoté chonta. <sup>9</sup> Kjánchó ntáchro Ìnchéni kixin jehó tí kjuachaxién ch'án chrókjuachaxiān janhan. Kixin tí kjuachaxién ch'án antsí tsjakoexín chojni fuértehya. Méxra ntá chàna kixin fuértehyana kixin ntá xikaha tsjakoxiān tí kjuachaxin kuènte Cristo. <sup>10</sup> Méxra chàna kjónté fuértehyana la ko kjónté t'ántaxina sín la ko kjónté t'ichjánxinna nkehe la ko kjónté chónkina sín chrók'óyánna sín la ko kjónté siín kjuaxikaon chrókjuasótexinna kixin tí tinkachónkia Cristo. Chàna kixin fuértehyana na mé fuérte janhan kixin Cristo tinkachónkia.

*Tóxakonhen ch'ín Pablo kixin tí sín tjejó ninko ch-jasin Corinto*

<sup>11</sup> ¿Á lócona kixin xikaha xrjanka? Kjánchó jahará kuítekákonhyará ntá xikaha xrjanka. Jahará chróchronkará xikaha kixin jina janhan. Jehya kixin kánhyó sínkína la ntá tí sín chréhérá la antsí sínkí sín. Náhi. Kjónté janhan la chaxín ninkehó sínkíhyana. <sup>12</sup> Kjuásian itsjé kjuaxroan jié la jina kjuak'é kónínkakonhya kjuákoxian kixin chaxín janhan ijnko nkexro tsíkjeýá Ìnchéni. <sup>13</sup> ¿Xá k'uikuau tí jahará éxí kánhyó sínkírá a ntá tí í so ninko la antsí sínkí sín kixin tí kjuasán janhan la ninkehó xra tjaáhyará? A ntá tí xikaha ntoáhya kjuít'a la tónínkakonhyará.

<sup>14</sup> A ntá ijie ó yaxinna tí nixin vez chrókjuasántsahará la ko tjaáhyará ninkehó xra. Janhan la tjéyáhya tí nkehe chontará. Tí nkehe tjéyá janhan la mé jahará kixin jahará éxí yóhe xjanna t'íkuan. Méxra tí sín it'é xjan chrókjuenájin sín chichaon chrók'uayakuenxín sín xjeen sín. Jehya xra kuènte tí xjan chrókjuenájin xjan chichaon chrók'uayakuenxín sín tí it'é xjan. <sup>15</sup> Tóxakonnahya kjónté chrókjuíntakjeje kaín nkehe chonta janhan o kjónté chrók'uénxian kixin tí jahará la jina chrók'uejorá. A ntá janhan imá tjuahará la kjánchó éxí tona janhan kixin jahará kánhyó tjuèherá tí janhan.

<sup>16</sup> Méxra kjónté janhan tjaáhyará ninkehó xra la kjónté xikaha ntáchorá kixin kjuít'ayahará, ichrorá. <sup>17</sup> ¿Xá kjuít'ayahará kixin jnkojín sín ichr'an kjuíjtsjehe sín tí jahará? <sup>18</sup> Kjuáncháha tí ch'ín Tito kixin tsjijtsjehe ch'án tí jahará la ko

kjāxin kuétuānhan tí í jnko kichó ni sátsjikotoxin ch'án. ¿Á kjuít'ayahará ch'ín Tito ní? ¿Á chaxínhya jína k'uéjóni yóini ntiha kixin jnkokón Nchakuen Dios chóntani?

<sup>19</sup> ¿Á tjenkayáxinrá kixin xikaha kjuáteheni kixin chóntani jie ní? Kjánchó xikahya. Dios tjetsjehe kixin nixjani éxi chojni tinkáchónki Cristo. Kichóni tjuahará la kaín tíha ntáxrjan kixin tjínkavan kixin antsí chrókuinkachónkirá Ìnchéni. <sup>20</sup> Tóxakonna kixin tió tsjasántsjahará la tsoxrjinnahya nkexrí tjejorá la ko kjāxinrá tsoxrjíanhyará tí nkehe tsontáxrjan. Tóxakonna kixin naxa ts'ixin kjuanínkaon la ko naxa ts'ixin kjuachjinóxínhin la ko tsoninkákonhénrá kichuára la ko chrókuétoanrá jahórá la ko naxa tsinkachónkirá kjuach'ia la ko naxa ts'ántaxínhínrá kichuára la ko naxa chontará kjuahnke la ko jnkokoáhya tsjenkayáxinrá. <sup>21</sup> Tóxakonna kixin tió tsjasántsjahará inaá la tí Dios kuéntana mé sinch-esuana tí tjejorá la ntá imá tsotsjanika kixin itsjérá tsíkjasínrá jie tí ósé la naxa titoéhyará tí nkehe tjuáhya ch'erá la ko naxa titoéhyará chontará chojni chjin ókjé tjásinkoará jie la ko titoéhyará kaín tí í so nkehe jínahya k'uékjich'erá ósé.

## 13

*Nhexraxinkaon ch'án sín la ko tsjixixín nixja ch'án*

<sup>1</sup> A ntá jie la níyaxín tsjasántsjahará. A ntá tí kaín nkehe tjínkáonrá tsonóna la mé chróchrónka yaá o iy'á chojni tsík'ikonxín kon sín tí nkehe tsíkónhen. <sup>2</sup> Nixjahá tí sín tsíkjasin jie ósé, la ko nixjahará kaín rá kixin kjónté ikjín tjèn la inaá nixjahará éxi

nixja tí kjuak'é k'uéjóni tí iyó kjuasántsahará kixin tió tsjasán inaá la í tsikonóahya tí sín kjuasin jie. <sup>3</sup> Jahará tjinkáonrá tsinhínrá á chaxín níxjaxian kjuachaxin kuente Cristo. Jehya kixin Cristo tsjachahya tsjakoxin ch'án tí kjuachaxién ch'án tí tjejorá ntiha. Náhí. Chaxín tjakoxin ch'án tí kjuachaxin chóna ch'án tí tjejorá ntiha. <sup>4</sup> Chaxín tí k'uénxin ch'án tí ntacruz la mé éxí chóntahya ch'án kjuachaxin. Kjánchó ijie tjechónxin ch'án tí kjuachaxin kuente Dios. Kjaxinni jeheni éxí kjuák'e ch'án k'uéchóntahyani kjuachaxin la ntá ijie tinkáchónkini tí jehe ch'án la tjejóchónxinni tí kjuachaxin kuente Dios kixin jína tsjinkitsani tí jahará.

<sup>5</sup> Jahará chrókjuenkayáxinrá á nchoxon tjejorá, á kaín asánrá tinkachónkirá Ìnchéni. ¿Á noahyará kixin tjejokoará Jesucristo? A ntá jahará tsonohará á chaxín tinkachónkirá o náhí. <sup>6</sup> Kjaxin tjínkavan chrókónohará kixin jeheni la jehya chojni chaxínhya tinkáchónki Ìnchéni. <sup>7</sup> Nixjeheni Dios kixin chrókuítqehya ch'án tí jahará kixin ninkehó nkehe jínahya chrókjuich'erá. Jehya kixin chrókjuakoxinni kixin jína tí jeheni. Náhí. Jehí tjinkaonni kixin jahará chrókjuich'erá nkehe jína. Ántosénni kjónté tsóntáchro sín kixin chóntani jie. <sup>8</sup> Ninkehó nkehe chrókjuich'eni kixin chrókjuinchek'itjáyanni tí nkehe chaxín. Kaín nkehe ch'eni la tjikosáyeheni tí nkehe chaxín. <sup>9</sup> Méxra chrókóchéheni tí t'ichjánxinhya imá chrók'ueqoanni, tí chaxín jína chrók'uejorá. Ntá naxa tsonixjeheni Dios kixin chrókjuixraká chrók'uejorá ntoá. <sup>10</sup> Mé xikaha ikjian tíhi senó

naxa tsjasántsájhyará ntiha kixin ntá tió tsjasán la ts'ichjánhxinhya naxa sinchekóninkáonrána tsoníxjāxiān tí kjuachaxin chonta janhan. Kixin Ìnchéni mé chjìna tí kjuachaxin jehya kixin chrókjuìntak'itjáyanrá. Náhí. Kjuanjon ch'án tíha kixin jahará antsí chrókuinkachónkirá Ìnchéni.

<sup>11</sup> Na ntá kichó ni, chrókócháhará. Tjéyará kixin jína chrók'uejorá. Chrókjuìnchechéhérá kichuára la jnkokoá chrókjuenkayáxinrá la ko kjuaxróxin chrók'uejorá. Kixin Dios mé ts'ejokoará ch'án.

<sup>12</sup> Nixjehérá kichuára jnkójina la tsehérá tja kichuára. <sup>13</sup> A ntá kaín tí sín tinkáchónki Ìnchéni ntihi mé xraxinkaon sín tí jahará.

<sup>14</sup> Kjuasáyé Ìnchéni Jesucristo la Dios tjuahará la ko tí Nchakuen Dios tjejókoará tjinkitsará kaín rá. Amén. Ó tjen.

**Tí Nuevo Testamento cuènte Inchéni Jesucristo  
C'óna Nquìva  
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

**Copyright Information**

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Popoloca, San Juan Atzingo

**© 1982, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 4 Mar 2023 from source files  
dated 29 Jan 2022

b9b09122-b3f6-59f0-9594-749907b32b5b